

西安府志

第二函
八冊

西安府志卷第三十五

人物志

本朝

梁化鳳張英梁敏壯功績記略公長安人字翀天丙戌科武進士順治四年授山西高山衛守備次年以破姜瓖賊功授大同掌印都司公氣度恢廓運籌制敵取決寸心而發應如神方授都司之明年一歲中身經二十二戰所向皆捷拔城拓地斬將擐旗而小寇勦殺不與焉正月攻破大同城北密溝敗衆竄據山巔懸柴以火燔之生擒敵將李義張豹而平其衆二月初十日攻渾源州及韓村玉合張家三堡二十九日破賈莊城擒敵帥王平三月四日破

渾源州城誅敵帥方三唐虎十三日攻左衛之雲崗高山
二城降之二十九日圍左衛身先士卒中三矢督戰益力
敵以城降論功越六等加都督僉事五月七日破敵將劉
遷萬餘衆於佳門忻口遷遁走太原依敵巡撫姜建勳十
五日公率兵攻之次日敵盡出其衆以致死戰公左臂中
鎗右髀中箭奮勇亟擊敵衆披靡執姜建勳並其監軍誅
之遂平太原二十九日引師解平陽城困六月二日至汾
州擊敵帥沈海敗之孝義縣敵總兵張爾德來救與戰大
破之明日破汾州城擒張爾德及敵平陽道張偉駐兵北
關九月八日沈海來襲我師復敗之沈海遁之潞安九月
二十三日攻曹家堡二十五日攻記古塞善信堡皆下之

於是介休平遙祁縣徐溝望風悉降十月四日攻太谷縣
蘇升出戰殪其前鋒明日城破敵守蘇升成擒十月引軍
下潞安沈海復遁之九仙臺公至克潞安連拔馬蘇趙民
三寨十一月四日攻長子縣拔之十一日進攻九仙臺山
勢突兀騎不得上公以火攻之衆不能支自誅其渠郭天
佑加友羅真崔海川武二等海勢蹙遂降以勝兵進定澤
州蓋公自五年冬從端親王用兵至此未嘗一日解甲寧
居也次歲三月復有牛鼻寨之戰生擒其將袁忠躬殺其
援將李虎四月四日盡殲其衆晉地悉平八年以副將借
補江南蕪萊營叅將蒞任之日適石血鷺鷥二湖大盜楊
萬科等作亂公擒獲之併其黨管有縉楊天生等十一月

授寧國副將十二年秋海寇張名振侵犯崇明據泊平洋沙以窺縣城公統兵迎擊於高橋洪橋獲賊魁老壽李七等二十二人衆賊潰散次年冬復師以巨礮擊碎賊舟生擒許奇潘忠等賊將溺死無算遂復平洋沙十三年授蘇松總兵因平洋沙懸隔海中戍守不及公就海築壩長十餘里使平洋沙接入內地寇患乃息且於其壩灌田千頃厥後洪澤盡作膏腴生民賴焉十六年五月鄭成功率衆號百萬舳艫蔽海先犯崇明遣謀疑衆公斬使焚書督兵迎擊擒賊將侯丁秀宮龍陳義等復遣諸將伏巷邀截獲賊犁艚斬賊將陳正縛致曾進等十一人賊潰去七月成功統領大艚直抵金山進逼戚儀破鎮江圍江寧烽烟十

里南北中梗援兵不利聲息危急公聞卽提所部三千人
星夜抵江寧登高審視見賊中精銳盡屯江干於七月二
十三日統兵出儀鳳門身先巷戰拔賊巨燾毀其木寨命
勇士乘高臨下屋瓦利矢飛火併發轟如天降賊將奔潰
自相踐踏追殺至龍江關生獲僞總統余自新併擒僞總
兵二人賊之鐵騎殺溺殆盡甲械鎗重遺棄如山賊前鋒
已敗而賊帥連營尚屯滿白土山岡其衆猶數十萬次朝
公命開神策門親統諸軍赴山奮擊另遣部將燒賊船隻
絕其歸路賊驚撲戰我師奮勇爭先斬刈如拉枯朽追奔
逐北血流有聲生擒僞提督甘輝成功脫免復逼崇明公
已先料早遣二將回防授以方略及賊薄城下二將登陴

固守而公乘勝進復瓜洲鎮江復抵海口賊不能得志將
爲遁計括民舟出白茆港以渡復與公遇絕流奪擊礮石
迷空海波爲沸賊衆盡散成功僅以身免十六年八月授
三等阿達哈哈番世職十七年加太子太保左都督十八
年十一月授江南全省提督授三等阿思哈尼哈番世襲
八次嗣因海寇初平游氛未息朝議欲立界遷沿海居民
於界內公謂以所棄地畝計之當缺賦額若干如以此益
兵添設營制則國旣足兵民無廢業由是江南沿海設兵
以衛桑麻雞犬耕鑿魚鹽民到于今受其賜焉李因篤梁
敏壯名臣祠碑略公自盛壯登壇老於戰陣干戈旣靖輕
裘緩帶日與賓客飲酒賦詩暇卽臨池善草書墨竹又諸

疏草條議禁令並已刊行崇儒重士月課觀風咸有成書
長子鼎

御前侍

衛次鼐蘇松水師總兵都督同知

按通志歷官浙閩總督

次鼐廣東

惠潮兵巡道按察司僉事次鼐官蔭候選諸孫長祚昌仲
祚晟餘幼公以康熙十年七月二十三日薨

皇上震悼

輟朝贈少保諡敏壯山西江南兩省祀名宦者數十區

陝西崇祀鄉賢暨名臣祠

按公以功世襲八次次子鼐因從征有功議叙拖沙喇
哈番准襲一次於康熙十六年承襲遂併爲二等阿思
哈尼哈番仍准襲八次緣事革職子祚昌仍襲三等阿
思哈尼哈番祚昌故子宏勳襲宏勳年老休致以孫秉

賜襲秉賜緣事革職無嗣乾隆四十二年以弟秉脊襲
殷化行潘耒殷公武略記公字熙如明末由山西沁水避
亂居咸陽之靳李村八歲失父母父友王某撫以爲子二
十二中武舉二十六成進士會滇逆倡亂黔蜀陷沒

天子命閣部莫洛爲經略自秦進討授公守備募義勇以從行次
寧羌糧不繼經略督促益嚴提督王輔臣之兵遂作亂殺
經略公陷賊中深自晦匿明年官軍復秦州

詔被脅官兵聽歸伍陝督哈占奏復其官從撫遠大將軍圖海平
涼郡勦牛頭山賊復香泉己未夏僞將軍王屏藩據漢中
遣其將陳君極引兵二萬出寶雞攻破砲臺營圍西山堡
勢甚急公至一鼓解西山圍守紅崖堡再戰再捷賊引去

欲窺秦隴公扼險賊不能過寶雞一步冬官軍三路進剿
奮威將軍王進寶由寶雞振武將軍鄂克濟哈勇略將軍
趙良棟由略陽公從圖大將軍哈制軍由興安大泥峪先
驅至鎮安自龍洞川攻兩河關克之擣興安復洵陽進至
漢中與奮威將軍兵會明年進取川蜀公駐漢中督軍餉
全蜀平議征滇黔建威將軍吳丹由永寧進振武將軍勇
略將軍由建昌進未及期賊將胡國柱陷瀘州攻永寧授
公漢中城守副將援蜀未至而永寧陷退守叙州國柱率
二萬衆來追公曰我若走賊追躡之立盡兵法云易地用
衆險地用寡唯有據險待敵猶兩鼠鬪於穴中力大者勝
遂扼險而陳賊盡銳攻之士殊死戰抵暮以草人秉炬爲

空營引軍潛退與大軍會夜半追軍至公自永寧至瀘州
二百餘里路皆險隘且戰且退凡十二晝夜乃渡瀘江全
軍而還衆復議以公守叙州未幾賊分三路圍叙州公深
溝高壘推誠待之降將與之協力固守久之卒不得逞而
去明年逆孽遁還雲南公從西安將軍復永寧從哈總督
進征滇至交水簡親王等已圍雲南城以糧少檄止秦兵
班師回蜀公還駐漢中時康熙二十三年也尋由三屯營
副將陞臺灣鎮總兵初議築臺灣城公言此地皆浮沙城
之不易且孤懸海外卽有城不足恃然軍府所在不可無
木城親入山相視得木材令麾下人致二株不旬日城成
分建營壘繕甲厲兵時訓練之遂爲海外重鎮居三年調

襄陽總兵

兄公

奏罷臺灣鑄錢及秦中賑飢二事

按賑飢以襄陽米由水運至商州轉運西安

在康熙三十二年詳食貨志

癸酉冬調寧夏總兵嚴職守申軍令鋤其

驕蹇更定部曲爲分合法以練士製子母砲簡駝馬儲芻粟以待徵發乙亥冬

上將大

征厄魯特議三路出師陝西爲西路公時謀知噶爾丹在

柯布多西路兵期以三月中旬出肅州之鎮彝循黑河向崑都崙而進發西安滿兵三千人漢軍千人河西提督及四鎮兵六千人深入勦寇而以一總兵官率河西騎卒三千人駐營中途備接應滿兵帥則將軍博濟副都統四人佐之漢兵帥則振武將軍孫思克公與涼州總兵董大成

肅州總兵潘育龍佐之合將校凡二萬二千餘人人持五月糧馬皆有副以牛羊爲一月食進兵之期孫將軍以三月草未青請緩至四月旋奉

上諭西路兵毋出鎮彝改從寧夏出塞未幾復奉

旨撫遠大將軍費揚古以二月二十日發京師孫思克兵亦令二月二十左右發寧夏師期甚迫有司徵調芻糧倉卒未集而本鎮儲積多侵耗僅存者亦朽敗不可食諸路營驛馬及捐納之馬自遠而至並羸瘦公復念兵無廝養則任戰者少乃令兵二人帶餘丁或子弟一人供樵汲牽驅之役又人備驢二頭供運負其兵士應支之糧給價自買悉得善米又令多辦糗糒乾腊及解渴藥味以從軍裝之外若

爾具寒具革囊勒鞋鋏鐮繩索之類無弗備及期將軍
戎率滿漢兵相繼發寧夏二十五日辛亥公率官兵繼進
傍黃河行可十許日乃去河載水束芻度戈壁又二百餘
里至一山有古碣曰兩郎山或言卽狼居胥也四月四日
至郭奪力費大將軍自歸化城來期於此會兵而大將軍
已過倍道行十六日至甕金而得減兵之令初甘涼肅三
鎮兵自遠馳至寧夏卽出塞不及飼馬軍士得倉粟及餘
馬駝畜皆不暇擇及度戈壁馬相繼斃更前益苦乏水而
草未盡芽會大風雨數晝夜寒且飢顛仆營中及道旁者
相枕籍孫將軍議選精卒併糧馬以進其麾下僅得四百
人涼肅二鎮各三百人而檄公畱千五百人以五百人與

滿兵五百屯甕金需後糧至守之以待還師寧夏兵固多
預備公又善訪求水草雖踵大軍後常不渴乏身先將卒
日步行數次節馬力遇風雨謹覆蔽之或溫以火馬少斃
者所裹糧日檢飭不得遺棄及恣食人有餘糧馬有餘力
至是如令減遣而選銳卒千八百人畱五百人屯甕金餘
率以進數日及大將軍五月四日至土刺河十三日戊辰
前軍哨得賊嚴陣而前可二三十里過淖至昭磨多其北
大山千仞壁立山下平川廣數里林木斷續有河流其間
曲折環繞其南山差低於北漸陁而下有小山橫焉戰地
也小山可二十仞自西上爲崖三層自東崖上僅一層費
大將軍與孫將軍已上山前軍與噶爾丹遇佯北以致之

賊恃勝轉鬪而前軍爭小山公方將兵至山足知賊近急
登山遇孫將軍方下山公言宜急據此山巔不可下語未
既費大將軍亦至大將軍曰日將暮矣大礮不能卽至當
以來日戰耳公曰戰卽來日若此山爲賊據我營其下可
乎大將軍曰賊甚近不戰汝能夜守此山乎公曰願守此
迴鞭一麾兵皆上甫至山巔而賊亦登見我師旣據巔遂
止東崖下以崖爲蔽發炮上擊時大將軍布陳令河西兵
居中滿洲及蒙古兵居左右翼及戰寧夏兵千數百人居
左甘肅涼兵共千人居右皆登巔以陣其右衛西安諸滿
兵分列寧夏甘肅涼兵左右在山下川中及南山足而蒙
古渣薩克諸兵又分列滿兵之左右賊爭小山衝中堅故

河西兵迎其鋒公令士卒皆下馬發子母礮疊擊之噶爾丹及其嫂阿努娘子等亦皆冒矢石率衆舍騎而鬪鋒甚銳殺傷相當勝負未決公使人告大將軍曰川中兵宜從柳林出衝其脇賊必亂旣又望其陣後林中人馬甚衆而不出戰必婦女輜重也復告大將軍宜遣一軍往南出不意刼之賊返顧必擾動大將軍從之公望見兩軍將薄賊遂鼓兵控矢而下呼聲震天賊衆遂披靡墜下山者滿阡谷棄仗如麻殺阿努娘子得賊旗數十禽斬二千餘乘勝逐北策馬先馳麾下卒擁纛繼進遇輜重戒弗取且射且逐月下追三十里回視他部兵無至者方使人請諸軍偕進而大將軍傳令收兵乃整軍而還